



武  
門  
號  
卷  
186  
11



辨證錄卷之十一

松井家藏

婦人科

帶門

婦人有終年累月下流白物、如涕如唾、不能禁止、甚則臭穢、所謂白帶也、夫帶是溼病、以帶名者、因婦人有帶脉、不能約束、故以帶名之、帶脉通於任督之脉、任督病、而帶脉亦病、帶脉者、所以束帶胎之係也、婦人無此、則難以繫胎、故帶脉弱、而胎易墮、若損傷帶脉、則胎必不牢、然帶脉損傷、非獨跌閃挫氣也、行房過於縱送、飲酒過於顛狂、雖無疼痛之苦、其中暗耗、則白物自下、故帶病、尼師寡婦、出嫁之女多、處子在閣、未破瓜之女少也、然



室女天稟虛弱者亦有此病、况加之脾氣之虛、肝氣之鬱、溼氣之侵、火氣之逼、安得不患此症哉。夫溼盛火衰、肝鬱脾虛、則脾土受傷、溼土之氣下陷、是以脾精不守、不能化爲榮血、變成白滑之物、由陰門直下、欲自禁止、而不可得也。治法宜大補脾胃之氣、少佐之舒鬱之味、使風水不閉塞於地中、則地氣自升騰於天上、脾氣健而溼氣自消。方用完帶湯、白朮一兩、蒼朮三錢、甘草一錢、車前子三錢、山藥一兩、陳皮五分、人參二錢、白芍五錢、柴胡六分、荆芥五分、半夏一錢、水煎服。二劑輕、四劑止、六劑全愈。此方脾胃肝三經同治之法、寓補於升、寄消於散、開提肝木之氣、則肝血不燥、何致下赴於脾土、補益脾土之元、則脾經不溼、何難分消。夫水氣至於補脾、而兼補胃者、脾胃表裏也、脾胃氣之強、則脾不能旺、補胃正所以補脾耳。

此症用束帶湯亦效

鷄冠花一兩、白朮一兩、水煎

二劑卽愈、鮮鷄冠花三兩

婦人有帶下色紅者似血非血、所謂赤帶也、赤帶亦溼病火熱之故也。惟是帶脈係於腰臍之間、近於至陰之地、不宜有火、不知帶脈不通腎而通肝、婦人憂思以傷脾、又加鬱怒以傷肝、於是肝火內熾、下赴脾土、而脾土不能運化溼熱之氣、蘊結於帶脈之間、肝火焚燒、肝血不藏、亦滲入於帶脈之內、帶脈因脾氣之傷約束無力、溼熱之氣隨氣下降、同血俱下、觀其形象似血非血、其實血與溼俱不能兩分之也。世人以赤帶屬之心火者、悞耳、治法清肝中之火、扶其脾氣、則赤淋庶幾少愈乎、方用清肝止淋湯、芍藥一兩、當歸一兩、阿膠三錢、生地五錢、丹皮三錢、黃柏一錢、牛膝二錢、黑豆一兩、香附一錢、紅棗十枚、水煎服、一劑

少止、一劑又少止、四劑全止、十劑不再發。此方但去補肝之血，全不利脾之溼者，以赤帶之病，火重而溼輕也。夫火之所以旺者，由於血之衰也。補血足以制火矣。且水與血合，成赤帶，竟不能辨其是溼而非溼，則溼盡化爲血矣。所以治血可也。何必利溼哉？此方純治血，少加清火之味，故奏功獨奇。倘一利其溼，反而引火下行，轉難遽效耳。或問先前言助其脾土，今但補肝木之血，絕不補脾土之氣何也？不知用芍藥以平肝，則肝氣得舒，自不去尅脾土，是補肝正所以扶脾，何必加入參白朮之多事哉。

此症用黃白牛車散亦效

牛膝一兩、車前子三錢、黃柏二錢、白芍一兩、水煎服、四劑愈。

婦人有帶下而色黑者，甚則下如墨汁，其氣最腥，人以下寒之極也。誰知是火熱之極乎？夫火色宜紅，何成黑色？不知火極似水，

○乃假象也。其症必然腹痛，小便時必如刀觸，陰門必發腫，面色必紅，久則黃瘦，飲食兼人口必大渴，飲水少覺寬快。此命門之火，與膀胱三焦之火合，胃火又旺，四火同煎，安得不熬乾成炭色耶？此等之症，不致發狂者，以腎水與肺金之氣涓涓不絕，足以潤心，而濟胃耳。所以飲水下胃，但成帶下之症，火結於下，而不炎於上也。治法惟以瀉火爲主，火退而溼熱自舒也。方用利火湯、大黃三錢、白朮五錢、茯苓二錢、車前子三錢、王不留行三錢、劉寄奴三錢、黃連三錢、炒梔子三錢、石膏五錢、知母二錢、水煎服。一劑小便大利，一劑黑帶變爲白帶矣。三劑白帶亦少減去一半，再服三劑全愈。此方未免過於迅利，殊不知火盛之時，用不得依違之法，救焚而少爲迂緩，則火勢延燒不盡不止。今用黃連石膏知母梔子，一派寒涼瀉火之味，入於大黃之中，則

迅速掃除、又得王不留行與寄奴之味、利溼甚急、俱無停住之機、佐白朮車前子茯苓、成既濟之功也。

此症用清帶湯亦效

紗梔子三錢、黃柏三錢、甘草一錢、白芍一兩、車前子三錢、王不留行二錢、麥冬一兩、玄參二兩、水煎服四劑愈。

婦人有帶下色黃者、宛如黃茶濃汁、其氣帶腥、人以爲脾經之溼熱、誰知是任脈之溼熱乎、夫任脈本不能容水、如何溼氣入於中、而化爲黃帶乎、不知帶脉通於任脈、任脈直上走於唇齒、唇齒之間、原有不斷之泉、下灌於任脈、使任脈無熱、則口中津液盡化爲精、以入於腎中矣、惟有熱以存於下焦之間、則津不化精、而化溼、夫水色白、火色紅、今溼與熱合、欲變紅而不能、欲返白而不得、煎熬成汁、因變爲黃色矣、黃乃土之色也、真水真火合而成丹、邪水邪火合而成帶、世人以黃帶爲脾之溼熱、單去

○治脾、此黃帶之所以難痊也、方用退黃湯治之、山藥一兩、芡實一兩、黃柏二錢、車前子一錢、白朮一枚、水煎服、連用四劑、無不全愈、凡有白帶者、俱可以此方治之、而治黃帶、尤奏奇功、蓋山藥芡實、專補任脈之虛、又能利水、加之白朮、引入任脈之中、更爲便捷、所以奏功甚速、至所用黃柏、清腎中之火、腎與任脈相通、同羣共濟、解腎中之火、卽解任脈之熱矣。

此症亦可用鮮帶利溼湯治之

白朮茯苓各一兩、澤瀉車前子炒梔子各二錢、水煎服

婦人有帶下色青者、甚則色綠、如綠豆汁、稠黏不斷、其氣亦腥、此肝經之溼熱也、夫肝屬木、水之色屬青、帶下流如綠豆之汁、明是肝木之病、但肝最喜水、溼亦水也、何以竟成青帶之症、不知水雖爲肝之所喜、熟實爲肝之所惡、以所惡者合之所喜、必有

違其性者矣。肝之性既違，則肝之氣必逆，氣欲上升，溼欲下降，兩相牽掣，必停住於中焦之間，於是走於帶脈，從陰門而出，其色青綠者，正乘肝木之氣也。逆輕者，熱必輕，而色青，逆重者，熱必重，而色綠，似乎治青者易，治綠者難。然而解其肝中之火，利其膀胱之水，則帶病自愈矣。方用逍遙散加減治之。茯苓五錢，白朮五錢，甘草五分，陳皮一錢，柴胡一錢，白芍五錢，茵陳三錢，炒梔子三錢，水煎服。二劑色淡，四劑青綠之帶絕，不必多劑也。夫逍遙散解鬱之方也，何取之以治青帶？如是之神耶？蓋肝經溼熱留之者，因肝氣之逆也。逍遙散最解肝之逆氣，逆氣平，則溼熱難留，況益之茵陳之利溼，梔子清熱，肝氣清涼，青綠之帶，何自來乎？此方之所以奇而可用也。倘僅治青帶，惟以利溼清熱爲事，置肝氣於不問，亦安有止帶之日哉？

此症用利肝解溼湯亦效

白芍二兩，茯苓一兩，乾鷄別花五錢，炒梔子三錢，水煎服。

血枯門

婦人有年未至七七之期、經水先斷者、人以爲血枯經閉、誰知是心肝脾之氣鬱乎、人若血枯、安能久延人、世醫見其經水不行、謂其血枯、其實非血枯、乃血閉也、且經水非血也、乃天一之水、出之腎經之中、至陰之精、而有至陽之氣、故其色紅赤、似血而非血也、世人以經水爲血、此千古之悞、倘果是血、何不名之曰血水、古昔至聖創呼經水者、以出於腎經、故以經名之、然則經水早斷、似乎腎水之衰涸、吾以爲心肝脾之氣鬱者何、蓋腎水之生、不由於三經、而腎水之化、實關於三經也、腎非肝氣之相通、則腎氣不能開、腎非心氣之相交、則腎氣不能上、腎非脾氣之相養、則腎氣不能成、倘三經有一經之鬱、則氣不入於腎之中、腎之氣即閉塞而不宣、况三經齊鬱、縱腎水真足、尚有格格

○ 難出之狀、而腎氣原虛、何以媾精盈滿、化經水而外泄耶、此經之所以閉、有似乎血枯耳、治之法、必須散三經之鬱、大補其腎、補腎之中、仍補其三經之氣、則精溢而經自通也、方用溢經湯、熟地一兩、白朮一兩、山藥五錢、生棗仁三錢、白芍三錢、當歸五錢、丹皮二錢、沙參三錢、柴胡一錢、杜仲一錢、人參一錢、水煎服、連服八劑、而經通矣、服一月、人健不再經閉、兼易受孕、此方心肝脾腎四經同治之藥、補以通之、散以開之也、倘徒補、則鬱不開而生火、倘徒散、則氣益衰而耗精、設或用攻擊之味、辛熱之品、不特無益、而反害之也。

○ 此症用續補湯亦效

人參二錢、當歸五錢、白芍三錢、柴胡五分、麥冬五錢、北五味子十粒、白朮一兩、巴戟天五錢、炒棗仁五錢、紅花五分、牛膝一錢、沙參三錢、水煎服、十劑必通

○ 人有在室未嫁者、月經不來、腹大如娠、面色乍赤乍白、脉乍大乍小、以爲血枯經閉也、誰知是靈鬼憑身乎、大凡人心正、則邪不能侵、心邪則邪自來犯、或精神恍惚、夢裏求親、或眼目昏花、日中相狎、或假戚屬暗處貪歡、或明言仙人、靜地取樂、其先未常不驚詫爲奇遇、而不肯告人、其後則羞赧、爲淫褻而不敢告人矣、年深月久、人之精血、僅足以供腹中之邪、邪日旺、而正日衰、勢必至經閉血枯、死而後已、欲導其經、邪據其腹、而經難通、欲生其血、邪飲其精、而血難長、醫以爲胎、而非胎、醫以爲瘕而非瘕、往往有因循等待、成爲癆瘵之症、至死不悟、不重可悲乎、治法似宜補正以祛邪、然而邪之不去、補正亦無益也、必先去其邪、而後補正爲得耳、方用蕩邪丹、雷丸三錢、桃仁三十粒、大黃三錢、當歸五錢、丹皮五錢、生甘草二錢、水煎服、一劑必下穢物

半桶再用調正湯治之、白朮五錢、蒼朮五錢、茯苓三錢、陳皮一  
錢、甘草一錢、薏仁五錢、貝母一錢、水煎服、連用四劑、脾胃之氣  
轉經血漸行矣、前方蕩邪、後方補正、實有次第也、或疑身懷鬼  
胎必傷其血、所以血枯而後經閉也、今既墮其胎、乃不補血、反  
補胃氣者何故、蓋鬼氣中人、其正氣之虛可知、且血不能驟生、  
補氣自易生血、二术善補陽氣、陽氣旺而陰氣難犯、尤善後之  
妙法也、倘服補血之藥、則陰以招陰、吾恐鬼胎雖下、鬼氣未必  
不再種矣、故不若補其陽氣、使鬼祟難侵、生血愈速耳、

此症用殺鬼破胎湯亦效

水蛭炒黑研爲細末三錢、丹皮五錢、當歸尾五錢、大黃三錢、  
厚朴二錢、紅花五錢、牛膝三錢、生地五錢、桃仁去尖研碎、水  
與酒同煎一碗、空腹服一劑、卽下胎、如不下、再服二劑、無不  
下者、不必用三劑也、

血崩門

婦人有一時血崩、雙目黑暗、昏暈於地者、人以爲火盛動血也、然此火非實火也、乃虛火耳、世人一見血崩、往往用止瀉之藥、雖亦能取效於一時、而虛火未補、易於沖擊、隨止隨發、終年終月不能愈者、是止崩之藥斷不可用、必須於補之中、行其止之法、方用固本止崩湯、熟地一兩、白朮一兩、黃芪三錢、人參三錢、當歸五錢、炒黑乾姜二錢、水煎服、一劑崩止、十劑永不再發、倘畏藥味之重、減去其半、則力量甚薄、不能止矣、方中全不去止血、惟去補血、且不僅補血、更去補氣、非惟補氣、兼且補火、何也、夫血崩至於黑暗昏暈、則血已盡去、僅存一線之氣、若不急補氣、而先補血、則有形之血、不能速生、無形之氣、必且盡散、此所以不補血、而先救氣也、然而補氣而不補血、則血又不能易生、

補血而不補火、則血且凝滯、不能隨氣而速生也、況乾姜引血歸經、補中有收、所以間補氣血之藥並用之耳。

○此症亦可用補  
虛寧血湯

當歸五錢熟地一兩黃芪一兩甘草一錢炒黑荆芥三錢水煎服一劑即止崩四劑全愈

○一老婦血崩、目暗暈地、人以爲老婦虛極、因不慎房勞之故也、誰知多言傷氣

不節飲食之故乎、夫老婦原宜節損飲食、肯閉舌、未免有不宜言而言者、况原有宿疾、安肯無言、故一發復加閉口、始氣不傷而神旺、無奈老婦聞喜事而心開、稱譽不知多言傷氣、欲不崩而不可得者、治法必止其血也、誰知血愈止而愈多、以氣衰不能攝血耳、方用助氣斂血湯、白朮二兩、土炒黃芪四兩

醋炒三七末三錢、水煎服、一劑血少止、二劑血止、四劑全愈、此方補氣不補血、以氣能止血也、加之醋炒朮、耑以酸能救血也、加之三七者、以其能斷血也、然必多服、始能愈者、以老婦血虧氣衰、不大補何以止其耗散之原、陽使氣旺以生血乎、然此方可以暫止、老婦之血不能久旺、老婦之氣也、另用前方去三七、而多加當歸、用補血湯、朝夕吞服、並行爲之得到。

○有老婦血崩者、其症亦與前同、人以爲老婦之虛耳、誰知因虛又不慎房惱之故哉、婦人至五十之外者、天癸匱乏、原宜閉關、不宜出戰、苟或適興草草了、事尚不致腎火大動、倘興酣浪鬪、一如少年時、鮮不血室大開、崩決而墜矣、方用當歸補血湯加味療之、黃芪一兩、當歸一兩、三七根末三錢、桑葉十四片、水煎服二劑而血止、四劑不再發、然必須斷慾也、設再犯忌、未有不重

病者也。夫補血湯乃氣血雙補之神劑。三七根乃止血之聖藥。加入桑葉滋其腎中之陰。又有收斂之妙耳。但老婦陰精既虧。用此方以止其暫時之漏。實有奇功。不可責其永遠之績者。以補精之味尚少也。服此方四劑之後。增入白朮五錢。熟地一兩。山藥四錢。麥冬三錢。北五味一錢。服三月。則崩漏可以盡除矣。

此症用閉血湯亦效

人參白朮各一兩。三七根末三錢。北五味子二錢。水煎服。一劑卽止崩。減人參五錢。加熟地一兩。山茱萸五錢。麥冬五錢。再服四劑全愈。

少婦甫受孕三月。卽便血崩。胎亦隨墜。人以爲挫閃受傷。而血崩也。誰知是行房不慎哉。少年婦人行房。亦事之常也。何便血崩。亦因其氣之衰耳。凡婦人氣衰者。不耐久戰。戰久則必泄精。精泄太多。則氣益不能收攝。夫血矣。况加久戰。則虛火內動。精

門不關。而血室亦不能閉。於是胎不能固。內外齊動。而血又何能固哉。治法自當以補氣爲主。而少佐之止血之味。方用固氣湯。人參五錢。白朮五錢。當歸三錢。熟地五錢。茯苓二錢。甘草一錢。杜仲三錢。山茱萸二錢。遠志一錢。五味子十粒。水煎服。一劑血止。連服十劑全愈。此方固氣而兼補其血。已去之血。可以速生。將脫之血。可以盡攝。凡因虛血崩者。此方最宜通治。非僅治小產之血崩也。茲方不去止血。而止血之味。已全於中。所以可通治耳。

人參三錢。白朮五錢。茯苓山藥麥冬各三錢。遠志五分。杜仲山茱萸各二錢。阿膠三錢。甘草一錢。水煎服。一劑則愈。  
有婦人一交感。流血不止者。雖不至血崩之甚。然至終年不愈。未免氣血兩傷。久則有血枯經閉之憂。此等之病。成於月經來時。貪歡交感。精沖血管也。夫血管不可精傷。凡婦人受孕。乃血管

○ 已淨之時、倘經初來、其血正旺、彼欲出而精射之、則所泄之血、盡退而縮入、旣不能受孕成胎、勢必至積精化血、遇交感之時、淫氣觸動其舊日之精、則兩氣相感、精欲出而血卽隨之俱出矣、治法須通其胞胎之氣、引精外出、益之填精補氣之藥、則血管之傷、可以再補、方用引精止血湯、人參五錢、白朮一兩、茯神三錢、車前子三錢、黃柏五分、炒黑乾姜一錢、熟地一兩、山茱萸五錢、炒黑荆芥三錢、水煎服、連服四劑卽愈、十劑不再發、此方用參朮補氣、用熟地山藥補精、精氣旣旺、則血管自然流動、加入茯神車前、利其尿竅、尿竅利、而血竅亦利矣、加入黃柏、直入於血管之中、引夙精出於血管之口、再荆芥引敗血出於血管之外、益之炒黑乾姜、止其血管之口、一方之中、實有調停曲折之妙、故能除舊疾而去陳疴也、然旣服此藥、必須慎房幃三月、

○ 則破者不至重傷、補者不至再損、否則亦止可取目前之效耳、慎之哉、

此症用截流

丹亦甚效

茯苓炒黑荆芥車前子各三錢、牛膝人參各三錢、熟地一兩、白朮一兩、白朮一兩、斬艾一錢、肉桂三分、水煎服十劑全愈

婦人有懷抱、甚鬱口乾、作渴嘔吐、吞酸而血下崩者、人以火治之、時而效、時而不效者、蓋肝氣之結也、夫肝主藏血、氣結宜血結矣、何反致崩漏、不知肝性甚急、氣絀其性更急矣、急則血不能藏矣、治法宜開鬱爲主、然徒開其鬱、不用平肝之藥、則肝氣大開、肝火更熾、血亦何能止遏也、方用平肝止血湯、白芍二兩、白朮一兩、當歸一兩、柴胡一錢、三七根末三錢、甘草一錢、丹皮二錢、荆芥二錢、生地三錢、水煎服、一劑嘔吐止、二劑乾渴除、四劑血崩自愈、白芍平肝、得柴胡而鬱氣盡解、白朮利腰臍、血無積

住之慮、荆芥通經絡、血有歸還之藥、丹皮涼其骨髓之熱、生地清其臟腑之炎、當歸三七於補血之中行止血之法、自鬱散而血止也。

此症用舒肝藏

血湯亦佳

白芍一兩、香附荆芥三七根末各三錢、陳皮五分、甘草一錢、當歸白朮各五錢、白芥子一錢、水煎調服。

婦人有升高墜下、或閃跌受傷以致惡血下沖、有如血崩者、若作血崩治之用止瀉之藥、適所以害之也、其症必然按之疼痛久則面目痿黃、形容枯槁、治法須行血去瘀、活血止疼、則其血自止、苟不解其瘀痛、卽用補澀之品、則瘀血內攻、痛不能止、反致新血不生、舊血作祟也、方用逐瘀止崩湯、大黃三錢、生地一兩、當歸尾五錢、敗龜板三錢、芍藥二錢、丹皮一錢、枳壳五分、桃仁十粒、水煎服、一劑痛輕、再劑痛止、三劑血亦全止矣、不必服四

劑也、此方於活血之中、佐以下治之藥、故逐瘀如掃、止血亦即神也、此跌閃升墮、非由內傷而致、其本實不撥去標之病可耳、何必顧其本、而補其內哉、

此症用靈龜散

血湯亦甚效

敗龜板一兩、生地一兩、大黃一錢、丹皮三錢、紅花二錢、桃仁十四箇、水煎服、一劑輕、二劑愈。

人有每行人道、經水卽來、一如血崩人以爲胞胎有傷、觸之以動其血也、誰知子宮血海、因熱不固之故乎、夫子宮卽在胞胎之下、而血海又在胞胎之上、血海者衝脈也、衝脈寒而血虧、衝脉熱而血沸、血崩之病、正衝脈之熱也、然而衝脈旣熱、宜血之日崩矣、何必交接而始血來、蓋脾與肝之無恙也、脾健則能攝血、肝平則能藏血、人未入房、則君相二火、寂然不動、雖衛脈獨熱、血不外泄、及至交接、子宮大開、君相之火、翕然齊動、鼓其精房、

而血海泛溢、有不可止遏之勢、肝欲藏血而不能、脾欲攝血而不得、故經水隨交而至、若有聲應之捷焉、治法必須絕慾者、三月然後用滋陰降火之藥、涼其血海、則終身之病可半載而愈也、方用清海丸、熟地一觔、桑葉一觔、白朮一觔、玄參一觔、山茱萸八兩、北五味三兩、麥冬十兩、沙參十兩、地骨皮十兩、丹皮十兩、白芍一觔、龍骨醋淬二兩、山藥十兩、右斛八兩、各爲細末、蜜爲丸、每日早晚白滾水各送下五錢、服半年全愈、此方補陰而無浮動之虞、縮血而無寒冷之害、日計不足、月計有餘、潛移默奪、子宮清涼、血海自固也、倘不治其本源、止以髮灰白礬黃連五倍子、外治其幽隱之處、吾恐愈塞愈流也、

此症用清火切  
經湯亦可

人參白芍各一兩、舊棕蘭炒方一錢、黃柏末二錢、甘草一錢、三七根末三錢、水煎服、十劑可愈、二十劑全愈、然必須絕

慾事三月、否  
則要犯也

調經門

婦人有先期經來者、其經水甚多、人以爲血熱之極也、誰知腎中之水火旺乎、夫火旺則血熱、水旺則血多、此有餘之病、非不足之症也、似不藥有喜、但過於有餘、則子宮大熱、亦難受孕、恐有爍乾男精之慮、太過者損之、亦既濟之道也、然而火不可任其有餘、水斷不可使之不足、治法但少清其火、不必瀉水也、方用丹皮三錢、地骨皮五錢、白芍三錢、青蒿二錢、黃柏五分、熟地三錢、茯苓二錢、水煎服、此方名爲清經散、服二劑自平也、方中雖是清火之品、然仍是滋水之味、火瀉而水不與之俱瀉、則兩不損、而兩有益也、

此症用損餘湯亦效

地骨皮一兩、茯苓五錢、黃柏二錢、生地五錢、炒黑荆芥三錢、玄參五錢、水煎服、四劑而經調矣

婦人有先期經來、其經水止有一二點、人亦以爲血熱之極也、誰知腎中火旺、而陰水虛乎、先期者火氣之冲、多寡者水氣之驗、故先期之來多、火熱而水有餘、先期之來少、火熱而水不足、倘一見先期、俱以爲有餘之熱、但瀉火而不補水、或水火兩瀉、加何不增病哉、治法不必瀉火、專補其水、水足而火氣自消、方用玄參一兩、生地一兩、白芍五錢、麥冬五錢、阿膠三錢、地骨皮三錢、水煎服、連服四劑、而經調矣、方名兩地湯、以地骨生地同用耳、二味俱能涼骨中之熱也、骨中之熱、由於腎中之熱、涼其骨髓、則腎氣自寒、又不損傷胃氣、此治之巧也、況所用諸藥、純是補水之味、水盛而火安得不平乎、此條與上條並觀、斷無悞治、先期之病矣、

此症用加味純陰湯亦效

熟地玄參麥冬各五錢、山茱萸二錢、北五味子一錢、丹皮五錢、水煎服、可用十劑、經水自多

○  
婦人有經來後期而甚多者、人以爲血虛之病也、誰知非血虛也、蓋後期之多少、實有不同、後期來少、血寒而不足、後期來多、血寒而有餘、夫經水雖本於腎、而其流則五臟六腑之血皆歸之、故經一來、而諸血盡來附益、以經開而門啟、不遑迅闔、諸血乘其隙而皆出也、但血既出矣、則成不足之症、治法宜於補中溫之、非曰後期者、俱不足也、方用溫經攝血湯、白芍一兩、川芎五錢、肉桂五分、熟地一兩、白朮五錢、續斷一錢、五味子三分、柴胡五分、水煎服、二十劑經調矣、此方大補腎肝脾之精血、加肉桂以祛其寒、加柴胡以解其鬱、是補中有散、而散非耗氣、補中有瀉、而瀉非損陰、所以受補之益收溫之功也、是方凡經來後期者、俱可用誠調經之妙藥、攝血之仙丹也、倘人元氣虛、加入人

參一二錢，未爲不可耳。

此症用溫帶益  
經湯亦效

熟地一兩、白朮、杜仲各五錢、肉桂一錢、茯苓人參各三錢、水煎服

婦人有經來斷續，或前或後，無一定之期者，人以爲氣血之虛，誰知是肝氣之鬱結乎？夫經水出諸腎經，肝爲腎之子，肝鬱則腎亦鬱，腎鬱而氣自不宣，前後之或斷或續，正腎氣之或通或閉，母必有顧復之情，肝泄而腎自有繾綣之誼，肝氣之或藏或閉，卽腎氣之或去或留，有相因而至者矣。然則治法舒肝之鬱，卽所以開腎之鬱也。卽所以定經水之流也。方用定經湯，白芍一兩、當歸一兩、熟地五錢、山藥五錢、菟絲子一兩、柴胡五分、荆芥炒黑一錢、茯苓三錢，水煎服，二劑經水淨，四劑經期定矣。此方

舒腎肝之氣，非通經之藥也。補肝腎之津，非利水之品也。腎肝氣舒而經通，肝腎津旺而水利，不治之治，正妙於治也。

此症用順經

湯亦效

香附生地、茯苓、白朮、芍子各三錢、當歸一兩、白芍一兩、車前子二錢、神曲、甘草各一錢，水煎服，十劑自調。

婦人有數月一行經者，每以爲常，且無或先或後之異，又無或多或少之殊，人以爲異，而不知非異，此乃無病之人，氣血兩不虧損耳。婦人之中，有天生仙骨者，經水必四季一行，蓋以季爲數，不以月爲盈虛也。婦人之經水不泄，則黃河便可逆流，真氣內藏，則坎中之陽不損，倘加以煉形之法，一年之內，便易飛升，無如世人不知煉形之法，見經水之不來，悞認作病，妄用藥餌，往往無病而成病，余聞異人之教，特爲闡揚，使世人見此等行經，在不必治之列，萬勿疑爲氣血之不足，而輕施醫療也。雖然天

辨證錄 卷之二  
生僊骨之婦、世正不少、而嗜慾深者、天分損也、又不可不立一  
救療之方、方名助仙丹、白术三錢、茯苓五錢、甘草一錢、山藥三  
錢、陳皮五分、白芍三錢、杜仲一錢、菟絲子二錢、水煎服、不損天  
然之氣血、便是此方平補健脾益腎、解鬱消痰、二四劑、而仍如  
其舊、不可再服、調經之大益、何必用重劑以助火、用熱藥以通  
經哉、

此症用肝腎雙

治湯亦佳

白芍三錢、當歸山藥熟地各五錢、甘草五分、陳皮三分、  
茯苓山朱萸各二錢、神曲一錢、水煎服、自然如期矣、

○ 婦人至五十之外、或六七十歲者、忽然行經、或如紫血之塊、或如  
紅血之淋、人以爲老婦行經、是還少之期、誰知乃血崩之漸乎、  
婦人至七七之外、天癸已窮、又不服補陰濟陽之藥、如何能使  
精滿化經、一如少婦乎、不宜行經、而行經者、乃肝不藏血、脾不  
統血也、非泄精而動命門之火、必氣鬱而發龍雷之炎、二火發  
動、血乃奔失、有似行經、而是非行經也、遇此等之病、非大補脾  
肝、則血不能驟止、然而補肝脾者、不可全補血以止血、尤當兼  
補氣以止血也、方用安老丹、人參一兩、黃芪一兩、熟地一兩、山  
茱萸五錢、甘草一錢、木耳灰一錢、當歸五錢、阿膠一錢、香附五  
分、荆芥一錢、白术五錢、水煎服、一劑少減、二劑又減、四劑全止、  
十劑全愈、此方補益肝脾之氣、氣足自然生血、且能攝血也、況  
且大補腎水、腎水足、而肝氣益舒、肝氣舒、而脾氣得養、肝藏血、  
脾統血、安有漏泄乎、血既無漏泄之失、何慮於血崩乎、

此症亦可用芪朮

調經散治之  
人參三七根末各三錢、白朮當歸黃芪各一  
兩、生地五錢、水煎調服、一劑即止、四劑愈

○ 婦人有經水、忽來忽斷、時痛時止、往來寒熱、人以爲血結之故、不

知乃肝氣不舒耳、夫肝屬木、最惡者寒風也、婦人行經、則腠理大開、適逢風吹、則肝氣閉塞、經水之門、亦隨之而俱閉、於是腠理經絡、各皆不宣、而作寒熱、氣行於陽而熱生、氣行於陰而寒生也、然此猶感寒之輕者、倘外寒更甚、則內熱益深、往往有熱入血室、變爲似狂之症、一如遇鬼之狀、今但往來寒熱、是寒未甚而熱未深耳、治法補肝中之血、通鬱而散其風、則病隨手而效也、方用加味四物湯、熟地一兩、川芎三錢、白芍五錢、當歸五錢、白术五錢、甘草一錢、延胡索一錢、丹皮三錢、柴胡一錢、水煎服、此方用四物以滋脾胃、用柴胡白芍丹皮、以宣揚風鬱、用甘草白术延胡、利腰臍、以和腹痛、入於表裏之間、通於經絡之內、用之得宜、自然奏功如响也、

此症用開結

湯亦佳

柴胡續斷神曲各一錢、香附川芎丹皮各三錢、當歸熟地各一兩、白术五錢、甘草一錢、水煎服、十劑全愈

婦人有經前疼痛數日、後行經者、其經水多是紫黑之塊、人以爲熟極也、誰知鬱極而火不能化乎、夫肝中有火、鬱則不揚、經欲行、而肝氣不應、則拂抑其氣而痛生、然經滿則不能內藏、肝中火氣焚燒、內逼經出而火亦隨之而怒泄、其色紫黑者、水火兩戰之象也、成魂者、火煎成形之狀也、經失其爲經、正鬱火內奪其權耳、治法似宜大瀉肝中之火矣、然瀉肝之火、不解肝之鬱、則熱之標可去、熱之本未除也、方用宣鬱調經湯、白芍五錢、當歸五錢、柴胡一錢、香附一錢、鬱金一錢、丹皮五錢、白芥子二錢、甘草一錢、黃芩一錢、炒梔子三錢、水煎服、連服四劑、下月斷不先腹痛、而後行經也、此方補肝之血、又解肝之鬱、利肝之氣、又退肝之火、所以奏功如神耳、

此症用香草

散亦佳

香附茯神各三錢、依胡索甘草神麴天花粉各一錢、炒梔子黃芩各二錢、白朮生地麥冬各五錢、陳皮五分、水煎服

婦人有經後小腹作痛、人以爲氣血之虛、誰知是腎氣之涸乎、夫經水乃天一之水、滿則溢、空則虛、亦其常也、何以虛能作痛哉、蓋腎水一虛、則水不能生肝、而肝必下尅於脾土、土木相爭而氣逆、故作痛也、治法亦須舒肝氣爲主、而益之補腎之味、則水足而肝氣益安矣、方用後調湯、阿膠三錢、荆芥三錢、巴戟天一錢、山藥五錢、白芍三錢、當歸三錢、甘草一錢、山茱萸三錢、水煎服、此方平調肝腎、既能轉逆於須臾、尤善止鬱痛於頃刻、經後以此方調理最佳、不止治經後腹痛也、

此症用填經止痛丹亦神

熟地二兩、山茱萸五錢、山藥三錢、甘草一錢、肉桂五分、水煎服

婦人有行經之前一二日、忽然腹痛而吐血、人以爲火盛之極也、誰知肝氣之逆、而不順行、而上吐乎、夫肝之氣最急、宜順不宜逆、順則氣安、逆則氣動、血隨氣而俱行、若經逆從口上出、乃少陰之火、急如奔馬、得肝中龍雷之氣、直冲而上、其勢最捷、反經爲血、又至便也、不必肝不藏血、始成吐血之症、但此等吐血、不同各經之吐血、各經吐血、乃內傷而成、此逆經吐血者、乃內溢而激之使出也、其症絕有異同、而逆氣則一也、治法似乎治逆以平肝、不必益精以補腎、雖然逆經而吐血、雖不損夫血、而反覆顛倒未免傷腎之氣、而血又上泄過多、則腎水亦虧、必須於補腎之中、以行其順氣之法也、方用順經湯、當歸五錢、白芍三錢、熟地五錢、茯苓三錢、牛膝三錢、丹皮五錢、沙參三錢、荆芥炒黑三錢、水煎服、一劑吐血止、二劑經順、連服十劑、不再逆經也、

此方於補腎補肝之中、用引血歸經之藥、肝氣不逆、腎氣自順也、腎氣既順、經何能逆哉。

此症用順肝藏  
血丹亦效

白芍當歸熟地各一兩、荆芥炒黑三錢、牛膝人參茯苓各二錢、柴胡五分、烏藥五分、澤瀉一錢、水煎服、二劑卽順行矣。

○人有經水將來三五日前、臍下疼痛、狀如刀刺、寒熱交作、下如黑色豆汁、旣而經來、因之無娠、人以爲血熱之故、誰知是下焦寒溼相爭耶、夫寒溼之氣乃邪氣也、婦人有任衝之脉、居於下焦、衝脈爲血海、任脈主胞胎、爲血室、皆喜正氣之相通、最惡邪氣之相犯、經水由二經而外出、若寒溼之氣彌滿於二經之外、勢必兩相爭而作疼痛矣、邪感正衰、寒氣生濁、下如豆汁之黑者、見北方寒水之象也、治法利其溼、而溫其寒、衝任無邪、何至搏結作痛哉、方用溫脾化溼湯、白朮一兩、茯苓三錢、巴戟天五錢、山

藥五錢、扁豆三錢、白朮十枚、蓮子三十粒、連心用水煎服、然必須經未來前十日服之、四劑而邪去經調、兼可種子也、此方用白朮、以利腰臍、更用巴戟白朮、以通任脈、再用山藥扁豆蓮子、以衛衝脈、故寒溼盡去、經水自調矣、倘疑腹痛爲熱邪之作祟、妄用寒涼、則衝任虛冷、血海變爲冰海、血室成爲冰室、毋論艱於生育、疼痛何有止日哉。

此症可用  
桂草玄丹

白朮二兩、肉桂一錢、甘草一錢、  
玄胡索一錢、水煎服、一劑愈

婦有經水過多、行後復行、面色痿黃、人倦無力、人以爲血熱之故也、誰知血虛而不歸經乎、夫血旺則經多、血少則經縮、然血歸於經、雖血旺而經亦不多、血不歸經、雖血衰而經亦不少、世人以經水過多爲是血旺、此治之所以錯也、惟多是虛、故再行而

○不勝其困乏、血損精散骨中髓空、不能華於面也、治法大補其血之不足、引其歸經、寧有經後再行之病哉、方用四物湯、加味治之、熟地一兩、川芎五錢、白芍三錢、當歸五錢、荆芥三錢、山茱萸三錢、白术五錢、續斷一錢、甘草一錢、水煎服、四劑而歸經矣、十劑之後、加人參三錢、再服十劑、下月行經適可而止、不再行也、四物湯乃補血之神藥、加白术荆芥、行中有利、加山茱萸續斷、止中有補、加甘草而調和得宜、所以血足、而歸經、經歸而血淨也。

此症用加味補

血湯亦佳

當歸黃芪各一兩、荆芥三錢、白术五錢水煎服、四劑人健、十劑全愈

婦有行經前、先瀉三日、而後行經、人以爲血旺之故也、誰知是脾氣之虛乎、夫脾統血、脾虛則氣不能攝血矣、且脾屬溼土、脾虛

○則土不實、而溼更甚、經水將動、而脾氣先不能固、脾血欲流注於血海、而溼氣先乘之、所以先瀉水、而後行經也、調經之法、在先補其氣、蓋氣旺而血自能固、亦氣旺而溼自能瀉、方用健固湯、人參五錢、茯苓三錢、白术一兩、巴戟五錢、薏仁三錢、水煎服、連服十劑、而經行不瀉矣、此方補脾氣以固脾血、則血攝於氣之中、脾血日盛、自能運化其溼、溼既化爲烏有、何能作瀉哉、

此症用术苓固

脾飲亦佳  
白术一兩、茯苓人參山藥芡實各五錢、肉桂五分、肉豆蔻一枚、水煎服、經未瀉前服此、則不瀉矣、多服爲妙

婦人有行經之前一日、大便出血者、人爲血崩之症也、誰知經入於大腸乎、夫大腸與行經之路徑、各別、何以能入於其中乎、蓋胞胎之系、上通心而下通腎、心腎不交、則胞胎之血、兩無可歸、心腎二經之氣、不來照攝、聽其自便血、乃不走小便、而走大便

矣、治法單止其大便之血、則愈止而愈多、反擊動三焦之氣、拂亂而不可止、蓋經之妄行、原因心腎之不交、今不使心腎之既濟、而徒安其胞胎、則胞胎之氣無所歸、而血又安有歸經之日哉、故必須大補心腎、使心腎之氣接、而胞胎之氣不散、則大腸之血、自不妄行也、方用歸經兩安湯、人參三錢、當歸五錢、白芍五錢、熟地五錢、山茱萸二錢、巴戟天一錢、白朮五錢、麥冬五錢、荆芥炒黑三錢、升麻四分、水煎服、一劑血止、三劑經止、兼可受娠、此方大補心肝腎三經之藥、全不去顧胞胎、而胞胎有所歸者、以心腎之氣合也、心腎虛、而氣乃兩分、心腎足、而氣乃兩合、心腎不離、而胞胎之氣、聽令於二經之靜攝、安有亂動之形哉、然則補心腎可也、何兼補夫肝木耶、不知肝乃腎之子、心之母也、補其肝血、則肝氣往來於心腎之間、自然土引心、而入於腎、

下引腎而入於心、不啻如介紹之歡也、

此症用加味歸

芎散亦神效

當歸白朮生地各一兩、川芎五錢、升麻一錢、一劑卽止血、而經行矣、二劑全愈

受姪門

婦人有瘦怯身軀、久不孕育、一交男子、臥病終朝、人以爲氣虛之故也、誰知血虛之故乎、夫血藏肝中、精涵腎內、若肝氣不開、則精不能泄、及精既泄、肝氣益虛、以腎爲肝之母、母既泄精、不能分潤以養肝木之子、而肝燥無水、則火且暗動以燬精、腎愈虛矣、况瘦人多火、又加泄精、則水益少、而火益熾、水難制火、腰腎空虛、所以倦怠而臥也、此等之婦、偏易動火、然而此火出於肝木之中、又是雷火而非真火、不交合則已、交則偏易走泄、陰虛火旺、不能受胎、即偶爾受胎、逼乾男子之精、有隨種而隨消者也、治法必須大補腎水、平其肝木、水旺而血亦旺、血旺而火亦減也、方用養陰種玉湯、熟地五錢、白芍五錢、當歸錢、茯苓二錢、山茱萸五錢、甘菊花一錢、丹皮二錢、山藥三錢、杜仲二錢、牛膝

一錢水煎服、服一月便可受孕、服三月身健斷斷可以種子、此方不特補血、純於填精、精滿則子宮易於攝、精血足則子宮易於容物、皆有子之道也、惟是世人貪慾者多、節慾者少、服此藥必保守者二月、定然坐孕、否止可身健勿咎藥品之未靈也、

此症用五美丹亦效

熟地一兩當歸山茱萸麥冬山藥各五錢水煎服十劑可以受胎矣

婦人有飲食少思、飽悶倦怠、惟思睡眠、一行房事呻吟不已、人以爲脾胃之氣虛也、誰知腎氣之不足乎、夫氣宜升騰、不宜升降、升騰於上焦、則脾胃易於分消、降陷於下焦、則脾胃難於運化、人無水穀之養、則精神自然倦怠、惟是脾胃之氣實生於兩腎之內、無腎中之水氣、則胃氣不能騰、無腎中之火氣、則脾氣不能化、故宜亟補腎中水火之氣、然僅補腎、而不用補脾胃之藥、

則腎中水火二氣不能提於至陽之上也、方用兼提湯、人參五錢、白朮一兩、熟地一兩、山茱萸三錢、黃芪五錢、枸杞二錢、柴胡五分、巴戟天一兩、水煎服、服一月、腎氣大旺、再服一月、未有不可受孕者、此方補氣之藥多於補精、似乎以補脾胃爲主、孰知脾胃健、而生精自易、是補脾胃、正所以補腎也、脾胃既旺、又加補精之味、則陰氣既生、陽氣易升、不必升提氣、自騰越於上焦、况原有升提之藥乎、陽氣不下降、無非大地之陽春、隨遇皆是生機、安得不受育哉、

此症用旺腎湯亦甚效

熟地一兩、山茱萸巴戟天各四錢、白朮人參各五錢、茯苓三錢、砂仁二粒、水煎服、服一月、自可受孕

婦人有下身冰冷、非火不煖、交感之時、陰中絕不見有溫熱之氣、人以爲天分之薄也、誰知胞胎之寒乎、夫寒水之地、不生草木、

重陰之淵、不長魚龍。胞胎寒冷、何能受孕哉。卽茹之於暫、不能不吐之於久也。蓋胞胎居於心腎之間、上系於心、下系於腎。胞胎之寒冷、乃心火之微、腎火之衰也。故治胞胎者、仍須補心腎之二火。方用溫胞散人參三錢、白朮一兩、巴戟天一兩、破故紙二錢、杜仲三錢、菟絲子三錢、芡實三錢、山藥三錢、肉桂二錢、附子三分水煎服、連服一月、胞胎熱矣。此方補心卽補腎、溫腎卽溫心、心腎氣旺、則心腎之火自生。心腎火生、則胞胎之寒自散。原因胞胎之寒、以致茹而卽吐、胞胎旣熱、豈尚有施而不受者乎。倘改方爲丸、朝夕吞服、則尤能攝精、斷不至悲伯道無兒之嘆也。

○此症用春溫

湯亦佳

人參巴戟天白朮杜仲各五錢、破故紙三錢、肉桂一錢、菟絲子五錢、水煎服、服十劑、自然溫和、可以受胎矣。

婦人有素性恬澹、飲食用少、多則難受、作嘔作瀉、胸飽悶脹、人以爲天分之薄也。誰知是脾胃之虛寒乎。夫脾胃虛寒、亦是心腎之虛寒也。胃土非心火不生、脾土非腎火不化。心腎之二火衰、則脾胃失其生化之權、卽不能傳化水穀、以化精微矣。脾胃旣失生化之權、不能化水穀之精微、自無津液以灌注於胞胎、欲胞胎有溫煖之氣、以養胎氣、必不得之數也。總能受胎、而帶脉之間、斷然無力、亦必墜落者也。然則治法可不亟溫補其脾胃乎。然脾之母在於腎之命門、胃之母在於心之包絡。溫補脾胃、必須溫補二經之火。蓋母旺而子不弱、母熱而子不寒也。方用溫土毓麟湯、巴戟天一兩、覆盆子一兩、白朮五錢、人參三錢、神曲一錢、山藥五錢、水煎服、連服一月、可以種子。蓋所用之藥、既能溫命門之火、又能溫心包之火、火旺則脾胃無寒冷之虞、自

然飲食多而善化氣血日盛、而帶脈有力、可以勝任愉快、安有不玉麟之毓哉、

此症用培上

散亦效  
肉桂一錢、茯苓三錢、蛇床子二錢、肉豆蔻一枚、北五味子一  
錢、陳皮五分、神曲一錢、人參白朮各五錢、肉蓯蓉三錢、水煎  
服

婦人有小腹之間、自覺有緊迫之狀、急而不舒、斷難生子、乃帶脉太急、由於腰臍之不利也、腰臍之不利者、又由於脾胃之不足、脾胃虛、而腰臍之氣閉、使帶脉拘急、胞胎牽動、精雖直射於胞胎、胞胎雖能茹納、力難載負、必有小產之虞、且人又不能節慾、安保不墜乎、治法必須利其腰臍之氣、而又大補脾胃、則帶脉可寬也、方用寬帶湯、白朮一兩、巴戟天五錢、補骨脂一錢、肉蓯蓉三錢、人參三錢、麥冬三錢、五味子三分、杜仲三錢、蓮肉二十

個、不可去心、熟地五錢、當歸二錢、白芍三錢、水煎服、連服四劑、腹無緊迫之狀、服一月、未有不受胎者、此方脾腎雙補、又利其腰臍之氣、自然帶脉寬舒、可以載物勝任、或疑方中用五味白芍之類酸、以收之、不增帶脉之急乎、不知帶脉之急、因於氣血之虛、血虛則縮而不伸、氣虛則攣而不達、芍藥酸以平肝、則肝不尅脾、五味酸以生腎、則腎能益帶、似乎相碍、而實能相成也、

此症用寬帶

白朮二兩、杜仲一兩、甘草二錢、  
水煎服、服四劑、無急迫之狀矣、

婦人有懷抱素惡不能生子、乃肝氣之鬱結也、夫有子之心、脈必流利而滑、肝脉必舒徐而和、腎脉必旺大鼓指、未有三部脉鬱結、而能生子者、卽心腎二部之脉、不鬱不結、而肝部之脉、獨鬱獨結、卽非喜脉矣、肝氣不舒、必下尅脾土、脾土之氣塞、而腰臍

之氣不利、何能通任脈、而達帶脈乎、帶脈之氣閉、而胞胎之口不開、精到門亦不受、治法必須開其胞胎之口、但舍開鬱、無第二法也、方用開鬱種子湯、香附三錢、白芍一兩、當歸五錢、丹皮三錢、陳皮五分、白朮五錢、茯苓三錢、天花粉一錢、水煎服、連服一月、則鬱結之氣盡開、無非喜氣之盈腹、自然兩相好合、結胎於頃刻矣、此方解肝氣之鬱、宣脾氣之困、腰臍氣利、不必通任脈、而任脈自通、不必達帶脈、而帶脈自達、不必啓胞胎、而胞胎自啓也。

此症用鬱金  
舒和散

白芍一兩、當歸五錢、鬱金香附神麴各一錢、枳壳三分、白朮三錢、川芎二錢、水煎服、鬱開自易得子矣、

婦人身體肥胖痰多、不能受孕、溼盛之故耳、夫溼從下受、乃言外邪之溼也、婦之溼、實非外邪、乃脾土內病也、因氣衰肉勝、外似

○健旺、內實虛損、不能行水、而溼停於腸胃、不化精而化涎矣、且肥胖之婦、內肉必滿、遮隔子宮、難以受精、何況又多水溼、亦隨入而隨流出矣、治法必須以瀉水化痰爲主、但不急補脾土、則陽氣不旺、溼痰未必去、人先病矣、方用補中益氣湯加味治之、人參三錢、當歸三錢、黃芪三錢、白朮一兩、陳皮五分、甘草一錢、柴胡一錢、半夏三錢、升麻四分、茯苓五錢、水煎服、連服八劑、而痰氣盡消、再服十劑、而水亦利、子宮涸出、易於受精、此方提脾氣而升於上、則水溼反利於下行、助胃氣而消於下、則痰涎轉易於上化、不必用消尅之藥、以損其肌、不必用滻決之味、以開其竅、陽氣旺、自足以攝精、邪溼散、自可以受種也、

此症用敦厚

散亦佳

白朮一兩、半夏人參各二錢、益智仁一錢、茯苓五錢、砂仁二粒、水煎服、十劑、痰消、易於得子、

婦人口乾舌燥、骨蒸夜熱、遍體火焦、咳嗽吐沫、斷難生子、人以爲陰虛火動也、誰知骨髓之內熱乎、夫寒陰之地、不能生物、而火燥旱田之內、何能望禾黍之油油也、然骨髓與胞胎、何相關切、而能使人無嗣、蓋胞胎爲五臟外之臟、因其不陰不陽、所以不列入於五臟之中、不陰不陽者、以其上系於心包、下系於命門、系心包者通於心、系命門者通於腎也、陰中有陽、陽中有陰、所以善於變化、生男生女、俱從此出、然必陰陽兩平、不偏不枯、始能變化生人、否則正不能生人也、且骨髓者、腎之所化也、骨髓熱而腎熱、腎熱而胞胎亦熱矣、况胞胎無骨髓之養、則嬰兒何以生骨髓、熱而骨中空虛、惟存火氣、何能成胎、而作骨哉、治法必須清骨中之熱、然骨熱由於水虛、補腎中之陰、骨熱自除、胞胎無乾燥之虞矣、方用清骨湯、地骨皮一兩、丹皮五錢、沙參五

錢、麥冬五錢、玄參五錢、北五味子五分、金釵石斛二錢、白朮三錢、水煎服、連服一月、而骨中之熱自解、再服二月、自可受孕矣、此方補腎中之精、涼骨中之髓、不清胞胎、胞胎無太熱之患矣、陰虛內熱之人、原易受胎、今因骨髓過熱、所以受精變燥、以致難於育子、本非胎之不能受精也、所以少調其腎、以殺其火之有餘、況又益其水之不足、更易種子耳、

此症用解氮

散、亦效

地骨皮一兩、丹皮沙參各五錢、白朮三錢、山藥一兩、水煎服、服一月、骨蒸自退、便可望子矣、

婦人有腰痠背楚、胸中脹悶、腹內生瘕、日日思寢、朝朝欲臥、百計求子、不能如願、人以腰腎之虛、誰知任督之困乎、夫任脉行於前、督脉行於後、然皆從帶脈上下而行也、故任督脈虛、而帶脉墜於前後、雖受男子之精、必多小產、况任督之間、有疝瘕之症、

則外多障礙、胞胎縮入於疝瘕之內、往往精不能施、治法必去其疝瘕之病、而補其任督之脉、則提挈有力、足以勝任無虞、外無所障、內有可容、安得不受孕乎、方用升帶湯、白术一兩、人參三錢、沙參五錢、肉桂一錢、荸薺粉三錢、鼈甲炒三錢、神龜二錢、茯苓三錢、半夏一錢、水煎服、連服一月、任督之氣旺、再服一月、疝瘕亦盡消也、此方利腰臍之氣、正升補任督之氣也、任督之氣升、而疝瘕有難存之勢、况方中有肉桂之散寒、有荸薺之祛積、有鼈甲之攻堅、有茯苓之利溼、有形自化於無形、無非升騰之氣、何至受精而再墜乎、

此症亦可用任督兩滋湯

白术一兩、人參五錢、肉桂一錢、茯苓三錢、白朮十個、黑豆一大把、杜仲五錢、巴戟天五錢、水煎服、十劑而任督之脈氣旺、可以攝精而受孕也

婦人有小水難澁、腹中作脹、兩腿虛浮、不能坐孕、乃膀胱之氣不能化也、夫膀胱與胞胎相近、水溼之氣必走膀胱、然而膀胱不能自己分消、必得腎氣相通、始能化水、從陰器以泄、倘膀胱無腎氣之通、則氣化不行、水溼必且滲入於胞胎、汪洋之田、何能生物哉、治法必須分消胞胎之溼、然腎氣不旺、胞胎之水氣、何從而化、故須治腎中之火、使火氣達於膀胱也、方用化水種玉丹、人參三錢、白术一兩、巴戟天一兩、肉桂二錢、菟絲子五錢、茯苓五錢、車前子二錢、芡實五錢、水煎服、二劑膀胱之氣化矣、四劑艱澁之症去、又服十劑、虛脹之形盡消、連服二月、腎氣大旺、易於受胎、此方利膀胱之水、全在補腎中之氣、然而補腎之藥、多是濡潤之品、不以溼而益助其溼、乎方中所用之藥、補腎之火、非益腎之水、補火無燥烈之虞、利水非蕩滌之甚、所以膀胱

氣化、胞胎不至於過溼、安有布種、而難於發育者乎。

此症用參术如

桂湯亦效

茯苓一兩、白朮一兩、肉桂一錢、人參五錢、水煎服、十劑而膀胱通利、腹亦不脹、可以受脈矣。

妊娠惡阻門

婦人懷姪之後、恶心嘔吐、思酸解渴、見食則憎、困倦欲臥、人以爲姪娠之惡阻也。誰知肝血之太燥乎。夫腎一受精、則腎水生胎、不能分潤於他臟、肝爲腎之子、日食腎母之氣、一旦無津液之養、則肝氣燥而益急火動而氣乃逆也。於是恶心嘔吐之症生、雖嘔吐不至大甚、而傷氣則一也。氣傷則肝血愈耗、世人以四物治產前諸症、正以其能生肝血也。然補肝以生血、未爲不佳、但恐生血、不能生氣、則脾胃衰微、不勝頻嘔、吾恐氣虛、血不易生也。故治法平肝補血之中、宜用健脾開胃之藥、以生陽氣、則氣能生血、尤益胎氣耳。然雖氣逆、而用補氣之藥、氣旺不益助其逆耶、不知懷姪惡阻、其逆不甚且逆亦因虛而逆、非因邪而逆也、因邪而逆者、助其氣而逆增、因虛而逆者、補其氣而逆轉。

○况補氣於補血之中、則陰足以制陽、何患於逆乎、方用順肝益氣湯、白芍三錢、當歸一錢、白术三錢、人參一錢、茯苓二錢、熟地五錢、蘇子一錢、麥冬三錢、砂仁一粒、神曲一錢、陳皮三分、水煎服、一劑惡阻輕、再劑而平、三劑全愈、此方肝腎脾胃肺五經同調之法、其意專主於肝腎、肝平則氣不逆、腎旺則血易生、凡胎不動、而少帶惡阻者、俱以此方投之、無不安靜、如故、有益於孕婦不淺、實勝於四物之湯也、蓋四物湯專治肝、此方不止治肝、所以奏功尤神耳、

用潤肝安娠

湯亦佳

人參茯苓扁豆山藥各三錢、半夏熟地白术各五錢、川芎、麥冬、丹皮、蘇子、神曲各二錢、白豆蔻一粒、陳皮三分、水煎服、連

眼四劑而

惡阻止矣

一妊娠每至五月、肢體倦怠、飲食無味、尤兩足腫、漸至遍身、後及

頭面俱腫、人以爲犯溼而然也、誰知是脾肺之氣虛乎、夫妊娠雖有按月養胎之分、其實不可拘於月數、據以健脾補肺爲主、蓋脾統血、而肺通氣也、胎非血不蔭、兒非氣不生、脾健則血旺、而蔭胎、肺清則氣壯、而生子、苟肺衰則氣餒、卽不能運氣於皮膚矣、脾虛則血少、卽不能運化於肢體矣、氣血兩衰、脾肺失令、飲食難消、精微不化、勢必氣血下陷、不能升舉、而溼邪卽乘其所虛之處、聚溼而浮腫矣、治法當補其脾肺之虛、不必以去溼爲事、方用補中益氣湯、加減治之、人參五錢、白术五錢、當歸三錢、黃芪三錢、陳皮三分、甘草一分、柴胡一錢、升麻三分、茯苓一兩、水煎服、一劑少脹、二劑卽寬、三劑漸消、四劑卽愈、十劑不再犯也、補中益氣湯原是升提脾肺之藥、似益氣而不益血也、不知血非氣不生、況溼氣相犯、未便補血、故補氣而助之、利溼之

味則氣升而水尤易散耳、然則少用利水之味可也、何重用茯苓至一兩、不幾以利水爲君乎、夫重用茯苓於補氣之中、雖是利水、仍是健脾清肺、凡利水之藥多耗氣血、茯苓與白朮、補多於利、所以重用以分溼邪、卽所以補氣血耳、

用土金雙培

湯亦效甚

人參蘇子茯苓穀芽巴戟天菟絲子白芍各三錢、白朮薏仁各五錢、山藥五錢、神曲二錢、砂仁一粒、甘草二分、柴胡五分、水煎服、四劑全消、

辨證錄卷之十一終



